

Zeitschrift: Il glogn : calender dil pievel : annalas per historia, litteratura e cultura romontscha

Band: 10 (1936)

Nachruf: Gion Disch : n. ils 3 de mars 1874, † ils 9 de schaner 1935

Autor: Gadola, Guglielm

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 08.07.2025

ETH-Bibliothek Zürich, E-Periodica, <https://www.e-periodica.ch>

Tals e semiglions citats sesanflassen aunc biars ella brev menzionada, mo jeu crei ch'ei fetschi cun quels per ina gada e vi trer alla cuorta. Resumond siu mein sur mia recensiu scriva el alla fin della brev: „Sche miu cudischet compara forsa en ina secunda ediziun, vegn jeu engrazieivlamein seprofitar de Tias bunas remarcas, deno d'ina buc! Pertgei jeu hai mai meritau il laud, che Ti cun aunc auters has dau a mi. Jeu hai bein luvrau cun diligenza e premura, mo adina giu il sentiment: Jeu sun nuot auter ch'in scolar dil pievel romontsch e de ses scribents e poets“.

En in'autra brev nua ch'el securregia davart enqual caussa, ch'jeu vevel fatg attents el, e nua ch'el fa sez critica sur siu cudisch, di el a mi: „Speronza sa ina secunda ediziun, procurada tras in auter maun, completar tscheu e leu, quei che maunca ella emprema.“ Schebein P. M. C., igl autur de „Im Lande der Rätoromanen“, ha tschaffau si mia recensiu per in maltractament, sa ussa in e scadin sez giudicar. Sur de quella caussa piardel jeu ni plaid ni miez pli.

Nus possedein in tschappel interessantas brevs de P. M., che nus vegnin a tener en salv sco in scazi zuppau. — La tendenza dellas biaras ei igl animar tier lavur litterara e cultur-historica. En quei grau ein quellas ualts identicas cun las circa 100 brevs de P. B. Berther p. m., che nus conservein medemamein, sc' in scazi custeivel.

A quels dus paders, ch'eran de caracter ualts different, ha beinenqual giuven romontsch d'engraziari siu anim e siu plascher per nies lungatg e sia cultivaziun. P. M. Carnot vegn ad obtener sias biografias; per P. Baseli vegn jeu a scriver in di ina. Els han omisdus meritau nossa renconuschientscha ed engraziamenti e meretan de restar en bona memoria tiel pievel romontsch. Requescant in pace!

II. Gion Disch

n. ils 3 de mars 1874, † ils 9 de schaner 1935

Ils 9 de schaner ei miert a Cuera el spital della Crusch, secretari guovernativ, Gion Disch, de Mustér.

Gion Disch ei staus sia veta in um de bien cor e de bien humor; entuorn el stevan ins tgunsch e cura ch'ins mava naven ded el, mavan ins sco optimist. La davosa gada che nus havein visitau el o'l spital della Crusch, saveva el buca tschintschar pli; il culiez era serraus ensemen e scurdaus fuva el de strusch enconuscher. Mo el ha tonaton priu la tabla e secret tut a riend sin quella cun sia detta smagriada: „L' orgla ei tut empaglia; jeu schulel ord las davosas schuletgas.“ Dus dis sissu ei Gion Disch staus bara.

Gion Disch ei igl emprem collaboratur defunct de nies giuven Glogn, al qual el ha demussau dapi sia naschientscha gronda e sincera simpatia. Jeu seregordel aunc fetg bein, ch'jeu hai dumandau el l' emprema gada per ina contribuziun al Glogn. „Cun plascher“, ha el rispondiu, „e sas pertgei? Perquei ch'il Glogn vegn sapientivamein ignoraus, ni sil pli sil pli aunc pitgaus — ellas gasettas. Epi aunc per enzatgei. Ton sco jeu hai viu entochen ussa ha il Glogn bunas intenziuns; el scriva ni per far fatschentas, ni per far proselits. Igli intent dil Glogn ei digns de vegnir sustenius da tuts ils scribents romontschs. Siu ideal ei la cultivaziun de nies lungatg, de nossa historia e de nossa cultura e perquei vegnel jeu a gidar Tei ton sco jeu sai e pos...“

Car Gion, per quels buns plaids, che Ti has detg a mi da lezzas uras — e sch'ei cuntenevan era stagn bia laud nunmeritau — sundel jeu staus engrazieivels a Ti, sco era per tiu niebel agid, duas caussas che han dau nova curascha e niev anim de luvrar vina von pigl ideal. Jeu engraziel a Ti era en num de tut ils lecturs dil Glogn, che han adina legiu tias bialas lavurs e poesias cun grond plascher e deletg.

La finamira de Tias poesias ei stau il delectar e Ti has era delectau tut tgi che steva entuorn Tei. Cun Tiu bien humor e cun Tiu optimismus ded aur has Ti savens fugentau las fugatschas e neblatschas della veta, ch'ei savens aschi criua e crudeivila. Ozlein nus engraziari a Ti per tut quei e mantener Tei en bona memoria.

Gion Disch veva ina secunda olma e quella fuva artista. Quei fatg ei stau per part sia ventira e per part sventira. Igl artist en el scheva emblidar enqualga ils crests e las fogas de questa veta aschi maluliva, mo dava da l'autra vard ad el era il catsch de seglir levamein sur tut ils dutgs ora.

Nies car defunct fuva ensamma in um fetg intelligent ed igl ei mo de deplorar ch'el ei buca vegnius de sviluppar ed applicar sias forzas intellectualas el temps adattau ed el ver liug.

Ses studis gymnasials ha el absolviu a Mustér ed a Nossadunnaun. Silsuenter frequenta el las universitads de Basilea e Berna, mo senza finir il studi della medischina. Havend stuiu ceder dall'idea de vegnir pictur-artist, havess Gion Disch era giu tuttas qualitads necessarias — e quei en ault grad — de vegnir schurnalist e politicher e sco tal havess il secretari guv. de pli tard (1919—1935) franc e seguir prestau lavur en uorden. Sco schurnalist fuss Disch cun sia intelligenza naturala, cun sia buna plema, cun sia viva fantasia, ed armaus cun in humor plein spért e cor e cun da tuttas sorts experientschas staus in um fatg. Mo el ha malgrad tut aunc adina prestau bia buns survetschs alla pressa conservativa, romontscha e tudestga.

El ha surviu alla vischnaunca de Mustér, al cumin della Cadi ed il davos al cantun cun buca pintga distincziun.

Dasperas fuva Gion Disch, sco gia menzionau, in sincer e fervent promotur dil lungatg romontsch. De sias canzuns e poesias vegn beinenquala a restar — ed aschiditg sco ei dat affons romontschs vegn era siu „Pieder Spalau“, il meglier poem humoristic ch'el ha fatg, a delectar nos pops e poppas, sco era ils affons empau pli gronds.

Ord la veta de nies car Gion savessan nus raquintar aunc beinenqual caussa, mo essend che nus havein gia secret ina pintga biografia ed era undrau ses merets en quella (mira: Annalas IL. p. 178—192), schelein nus schar de repetter cheu il medem.

Il davos onn de sia veta ha Gion Disch stuiu pitir bia dolurs e tribulaziuns, mo el ha acceptau quellas cruschs ord il maun de siu Scaffider cun curascha e resignaziun e preparau aschia a sesez in bien viadi sur cuolm. Siu davos suspir e desideri, ch'el ha aunc pudiu metter en rema, vegn il Segner seguir ad haver exaudiu:

„Spendra mei dal mal, fai libers dals pucaus,
Sin la fin po dai a mi miu sogn e bien ruaus“.

Giusep Huonder

President della regenza grischuna e cusseglier dils cantuns

n. ils 9 de settember 1878, † ils 22 de schaner 1935

Cum moriar, medium solvar et inter opus. (Ovid)

Strusch 15 dis suenter la mort de siu premurau e fideivel secretari, Gion Disch, ha era il cau dil departement stradal e forestal liquidau tut anetgamein sias fatschentas terrestras ed ei marschaus cun pei franc e seguir viers la perpetnudad.

G. Giusep Huonder ei naschius a Paris, ella capitala della nobla Frontscha, nua che ses geniturs eran setratgs per gudignar il paun de mintgadi, ch'era da lezzas uras aschi scarts ella patria sco oz puspei. Aunc pignets eis el vegnius anora cull'onda e staus cun lezza e siu aug a Rabius. Ella familia de Mihel Maissen eis el carschius si e vegnius tenius sco agen. Tgi havess era sminau da gliez temps, ch'il pign e falomber Gion Giusep vegnessi aunc a far in di ina tala carriera; gie, tgi havess era schau dar de quei el tgau, en quei temps che mo certas dynastias de familia vegnevan de semetter vid il tgamun de nossa democracia?! Mo inaga ni l'autra schabegia ei era, ch'il ver um vegn alzaus el ver liug — e quei perfin en ina democracia.

A Rabius ha il frestg mattet frequentau la scola primara e suenter eis el jus sin claustra e fatg la reala per continuar e finir quella 1899 cugl examen de maturidad el collegi de